

Nytt barnetrekke snart på plass

■ Breimsbygda Skisenter satsar vidare på Utvikfjellet

■ Investerer 3,0 millionar kroner



– Etter at vi opna det nye hovudtrekket på Utvikfjellet i 2006, har det gått så bra at vi torer å satse vidare. Eg veit ikkje nokon annan stad som kan måle seg med dette fjellet, seier styreleiar i Breimsbygda Skisenter, Jon Bjørn Fløtre. Her i lag med dagleg leiar Kåre Solheim (t.v.) og Kjetil Berge (t.h.).

Breimsbygda Skisenter ønskjer å utvikle Utvikfjellet til det beste alpinanlegget i fylket. No investerer selskapet 3,0 millionar kroner i nytt barnetrekke som skal vere klart til sesongstart. – Vi vil leggje til rette for heile familien, seier styreleiar Jon Bjørn Fløtre.

F.T.: Inger H. Aske Lothe

Arbeidet med å få på plass eit nytt barnetrekke på Utvikfjellet er godt i gang.

Ferdig om tre veker

– Vi har laga ein ny nedfart og planert denne godt. Så snart snøen kjem, kan vi starte opp. Trekktraséen er også ferdig, og no held vi på å køyre forskalingane til fundamenta opp i bakken. Det er firmaet Taubaneteknikk som skal støype fundamenta og få dei fem mastene på plass. Arbeidet vil truleg vere ferdig i løpet av tre veker, fortel Jon Bjørn Fløtre.

Det nye skitrekke til Breimsbygda Skisenter vil bli 270 meter langt. Det blir dermed tre gongar så langt som det gamle barnetrekke.

– Vi får også tre nedfartar frå toppen av skitrekke, ein på kvar side av den nye trekktraséen, samt den gamle nedfarten. Barnetrekke er tilpassa born, og vi skal ha same tallerkar som vi har i trekke som vi bygde i 2005, fortel han, og legg

til at dette vil verte eit stort framsteg.

– Det nye skitrekke blir mykje enklare å bruke enn det gamle systemet vi hadde, seier han.

Som følge av det nye barnetrekke, vil ein liten del av lysløypa i nærleiken blir lagt om.

11,0 millionar i alt

Breimsbygda Skisenter investerte 8,0 millionar kroner i nytt hovudtrekk i 2005. Dette vart teke i bruk i vinterferien i 2006. Etter den tid har det gått så pass bra at leiinga i selskapet torer å satse vidare. I fjor var det nesten ikkje ei einaste helg med fint vær. Likevel var aktiviteten i alpinbakken bra, og Breimsbygda Skisenter fekk ein grei sesong.

– Filosofien vår er å leggje til rette for heile familien på Utvikfjellet. Først bygde vi eit nytt hovudtrekk som er 900 meter langt, 300 meter lenger enn det gamle. No er vi i ferd med å byggje eit nytt barnetrekke. Det er borna som er framtida. Vi har lagt bak oss nokre relativt gode sesongar, og i tillegg har vi vore heldige med at Gloppen kommune har prioritert utbyggingane våre i tippemiddelsamanheng. Dermed ligg vi i prioritet til å få tippemidlar. Kommunen har i tillegg gjeve oss garanti, slik at vi kan låne pengar til investeringane, seier Fløtre.

2,1 millionar kroner kostar det nye barnetrekke. Lys og planering av nedfart kjem i tillegg. Ei ny køyrebu knytt til det nye skitrekke er også under oppføring.

– Totalt vil barnetrekke koste

oss rundt 3,0 millionar kroner. Dermed har vi investert for til saman 11,0 millionar kroner dei siste åra, slår styreleiaren fast.

Gler seg til ny sesong

Kåre Solheim er dagleg leiar i Breimsbygda Skisenter. Han gler seg til ein ny sesong med betra tilbod til borna.

– Det nye barnetrekke er noko heilt anna enn det vi har hatt. Vi får også eit større brukarområde her. Såleis høver dette trekke til

nybyrjarar i alle aldersklasser. Tautrekke som er tilpassa funksjonshemma vil vi òg halde fram med å drive. Det er Breimsbygda Idrettslag som eig dette, men vi har stått for drifta. Fire operative skitrekke har vi i alt. Når barnetrekke no blir lagt om og fornya, vil det bli lettare å kome til for dei som mellom anna likar å køyre i lausnø. Tidlegare har vi måtta stenge av mellom barnetrekke og hovudbakken, seier han.

To hoppbakkar er under planleg-

ging i tilknytning til alpinanlegget på Utvikfjellet, ein K10- og ein K20-bakke.

– Skiforbundet ønskjer å auke interessa for å hoppe på ski og vil ha hoppbakkar i alpinanlegga kring om. Vi har sett på eit område ved sida av det nye barnetrekke, men dette prosjektet vil ikkje bli gjort noko med i år. Kanskje skjer det noko neste år, seier Jon Bjørn Fløtre.



Det nye barnetrekke blir bygd på venstre side av Fjellstova.